

Bab 2

Sejarah Kemasukan Methodism ke Malaysia serta Struktur Organisasinya.

2.1 Tinjauan ringkas perkembangan agama Kristian sebelum kemasukan Methodism

Romans Catholics (Katholik) telah mula bertapak di Malaysia pada tahun 1511 dengan kemasukan Portugis di Melaka. Ini pula diikuti oleh Reformed Church pada 1641 apabila pihak Belanda mengambil alih teraju pemerintahan di Melaka daripada pihak Portugis.

Ini diikuti pula oleh Protestant Missions yang mula bertapak di Melaka pada 1815 (Means, 1935 : 8). Kedatangan mereka ini bukannya untuk menyebarkan agama Kristian mazhab mereka di sini. Sebenarnya mereka hanya memilih Melaka sebagai batu loncatan untuk memasuki Negeri China. Negeri China pada masa itu yang telah mengamalkan dasar tutup pintu telah menyebabkan Protestant Mission mencari sebuah tempat supaya kitab mereka dapat diterjemaahkan ke dalam Bahasa Cina serta dicetak. (Means , 1935 : 8).

2.2 Sejarah kemasukan Methodism ke Malaysia

Pada awal tahun 1884, Dr. Thoburn yang sedang berada di India telah mengeluarkan satu surat di dalam

Western Christian Advocate untuk mendapat 2 orang sukarela untuk memulakan kerja menyebarkan agama Kristian di Singapura (Thoburn , 1893 : 520). Missi mereka adalah untuk menyebarkan agama Kristian kepada orang-orang Eropah dan mereka yang lain yang boleh bertutur dalam bahasa Inggeris. Kemudian, mereka ingin mendirikan sebuah gereja yang berdikari di sana. Surat Dr. Thoburn ini telah disambut oleh 20 orang pemuda tetapi selepas menjalani satu temubual yang dijalankan oleh Dr. Thoburn sendiri, beliau mendapati tiada seorang pun daripada 20 pemuda tadi yang layak untuk dihantar ke Singapura untuk memulakan kerja di sana (Thoburn , 1893 : 520).

Berikutan ini, semasa persidangan Methodist India Selatan yang berlangsung pada 10-15 November, 1884 di Chandarjhat, Nyderabab, isu mengembangkan kerja Methodist ke Singapura telah hangat diperbincangkan. Bishop John H. Hurst yang sedang melawat India pada masa itu juga mempunyai kecenderungan untuk memulakan satu missi Methodist di Singapura (Scott , 1906 : 301).

Maka pada persidangan itu, satu persetujuan telah dicapai pada 25 November, 1884 untuk melantik William F. Oldham untuk menjadi "missionary" (mubaligh) di Singapura (Barclay , 1957 : 650). Ini telah diumumkan oleh Bishop John H. Hurst yang sedang melawat India Selatan ketika itu (Tan , 1964 : 55).

Pelayaran missi ini ke Singapura telah dianggotai oleh Dr. Thoburn, isteri Dr. Thoburn, Encik Oldham dan Cik Batie selaku pemain organ. Mereka telah belayar pada awal 1885 dan tambang pelayaran mereka telah dibiayai oleh gereja-gereja Methodist di Burma (Scott , 1906 : 303). Mereka telah belayar dari Calcutta melalui Rangoon ke Singapura.

Mereka telah disambut oleh Charles Philips semasa tiba di pelabuhan Singapura pada pagi Sabtu 7 Februari, 1885 (Barclay , 1957 : 651). Charles Philips sebenarnya telah menulis surat kepada Dr. Thoburn dua tahun yang lalu untuk menyampaikan hasratnya untuk mempelawa Dr. Thoburn untuk memulakan satu missi di Singapura (Means , 1935 : 15). Charles Philips dalam tidurnya telah bermimpi yang rombongan missi ini akan belayar masuk ke pelabuhan keesokannya lalu telah pergi ke pelabuhan untuk menyambut mereka serta menjadi tuan rumah kepada rombongan missi ini (Scott , 1906 : 304).

Pada keesokannya, kebetulan hari Ahad, satu perjumpaan telah diadakan di Dewan Bandar. Perjumpaan pertama itu telah dicatitkan oleh Oldham sendiri yang berbunyi :-

"Organ yang dibawa bersama itu dibuka bungkusannya dan Cik Batie telah ditugaskan untuk memainkannya. Dr. Thoburn pula duduk di sebuah platform sementara isterinya mengendalikan satu sesi nyanyian. Sementara itu Oldham sendiri pula menjadi "usher" dan membahagikan buku-buku nyanyian. Selepas nyanyian, ceramah dakwah pada hari itu telah dibacakan oleh Dr. Thoburn iaitu "Not by might, nor by power but by my spirit saith the Lord". Kemudian detik yang bersejarah telah berlaku iaitu Dr. Thoburn sendiri telah memberi satu ceramah dakwah Methodist yang pertama dan ulung sekali di Malaysia."

(Barclay , 1957 : 651)

Perjumpaan ini telah dilakukan di hadapan seramai 150 orang yang telah menghadiri perjumpaan pertama mahzab Methodist di Malaysia.

Daripada kumpulan ini, gereja pertama Methodist di Malaysia telah ditubuhkan (Means , 1935 : 19). Ia mempunyai tiga orang yang bertaraf keahlian penuh dan 15 lagi dalam kedudukan "probation" iaitu mereka yang masih lagi mengikuti kelas keahlian. Paderi yang pertama telah dilantik iaitu William F. Oldham dan dia dibayar gaji sebanyak \$700.00 setahun (Means , 1935 : 19).

Sekeping tanah telah diberikan oleh Majlis Perbandaran dan dengan usaha gigih Encik Polglase yang bekerja di Majlis Perbandaran, sebuah gereja telah

didirikan (Barclay , 1957 : 651). Pada akhir tahun 1885, gereja Methodist yang pertama di Malaysia telah berjaya didirikan di Coleman Street (Means , 1935 : 21). Maka bermulalah era Methodism di Malaysia sehinggalah ke hari ini.

2.3 Struktur Perjalanan Organisasi Methodist Pada Hari Ini Di Peringkat Nasional

Struktur perjalanan organisasi gereja Methodist pada hari ini telah dibahagikan kepada kumpulan iaitu berpandukan kepada bahasa yang digunakan. Kelima-lima kumpulan tersebut adalah terdiri daripada :

- 1) Sarawak Chinese Annual Conference
- 2) Sarawak Iban Annual Conference
- 3) Chinese Annual Conference
- 4) Tamil Annual Conference
- 5) Trinity Annual Conference (TRAC)

2.3.1 Sarawak Chinese Annual Conference

Ia telah ditubuhkan pada 1964. Ini adalah supaya kerja-kerja penyelarasan dapat dijalankan dengan lebih berkesan di kalangan penganut Cina di Sarawak. Ia hanya ada kena-mengena dan menyelaraskan perjalanan gereja yang menggunakan Bahasa Cina sebagai bahasa penghantarnya. Pada tahun 1990 ia telah menaja Sabah Mission Conference. Ia adalah satu pertubuhan untuk menjalankan pentadbiran gereja-

gereja di Sabah.

2.3.2 Sarawak Iban Annual Conference

Ia juga telah bermula pada tahun 1964. Ia juga bertujuan untuk menyelaraskan kerja-kerja di kalangan gereja bangsa Iban ini dengan lebih berkesan.

2.3.3 Chinese Annual Conference

Ia telah ditubuhkan pada 1936 dengan tujuan untuk menyelaraskan kerja-kerja gereja Methodist yang menggunakan bahasa Cina sebagai bahasa penghantarnya. Ia bertanggungjawab menjaga dan menyelaraskan perjalanan gereja Methodist Cina di seluruh Semenanjung Malaysia.

2.3.4 Tamil Annual Conference

Ia telah ditubuhkan pada 1968. Tujuannya juga sama iaitu untuk menjalankan penyelarasan yang lebih berkesan di kalangan gereja Tamil Methodist yang ada di Semenanjung Malaysia ini.

2.3.5 Trinity Annual Conference


Ia telah ditubuhkan pada 1968. Ini adalah bertujuan untuk menjaga dan menyelaraskan perjalanan gereja Inggeris Methodist di Semenanjung Malaysia. Pada tahun 1990 ia telah menaja Sengoi Mission Conference yang mana

pertubuhan ini adalah untuk menyelaraskan pentadbiran penyebaran agama kristian serta pentadbiran gereja-gereja orang-orang Senjoi.

2.4 Sejarah Struktur Organisasi Methodist Hari Ini

Pada 1889, perjalanan urusan Methodist di Singapura telah diletak sepenuhnya di bawah penyelarasan mereka sendiri. Sebelum ini, ia berada dibawah penyelarasan gereja Methodist di India. Satu jawatankuasa yang berasingan daripada yang di Calcutta telah dilantik. Pada 15 Ogos, 1968, gereja Methodist di Malaysia dan Singapura telah diberi autonomi sendiri oleh United Methodist Church, USA yang menyelaras segala perjalanan urusan rasmi Methodist Church di sini.

Kemudian pada tahun 1976, perjalanan urusan rasmi gereja Methodist di Malaysia dan Singapura telah dipisahkan untuk memudahkan pengendalian urusan gereja dikedua-dua buah negara ini. Gereja di kedua-dua tempat ini telah lama bersatu sebagai satu badan sejak kemasukan Methodism ke Malaysia. Maka Gereja Methodist Malaysia mempunyai perjalanan urusannya sendiri mulai 4 Disember, 1976.



2.5.1 Congregation

Ia terdiri daripada ahli-ahli gereja Methodist. Keahliannya adalah tidak terhad dari segi hak minimum mahupun hak maksimumnya.

2.5.2 Local Church

Ia adalah terdiri daripada congregation yang diatas. Tetapi untuk menjadi sebuah local church, ia mesti mempunyai sekurang-kurangnya 35 orang atau lebih. Ia mesti terlebih dahulu mendapat kebenaran daripada seorang District Superintendent sebelum menjadi sebuah local conference. Ia akan diketuai oleh seorang paderi atau seorang "layman".

2.5.3 Local Conference

Pada konteknya, ia adalah terdiri daripada sebuah local church dan apabila ia dipengerusikan oleh District Superintendent, ia dinamakan Local Conference. District Superintendent akan mempengerusikan mesyuarat yang berlangsung sebanyak dua kali setahun. Mesyuarat pertama ialah pada awal tahun untuk membincangkan tentang rancangan local church ini. Mesyuarat kali kedua pula iaitu pada akhir tahun adalah untuk melihat keputusan rancangan-rancangan yang telah dirancang di awal tahun tadi.

2.5.4 District Conference

Mesyuarat ini dipengerusikan oleh District Superintendent. Mesyuarat ini dihadiri oleh wakil dari setiap local church. District Conference ini juga akan berjumpa dua kali setahun iaitu pada awal tahun untuk merancang program-program yang hendak diadakan. Pada masa ini juga akan dibincangkan segala ketidakpuasan yang mungkin timbul serta juga untuk menyelesaikan apa-apa masalah yang telah timbul di mana-mana gereja dalam daerah tersebut. Mesyuarat pada akhir tahun pula ialah untuk melihat sejauh mana pelaksanaan dan keberkesanan rancangan-rancangan yang telah dirancang untuk tahun itu.

2.5.5 Annual Conference

Mesyuarat tahunan ini akan dipengerusikan oleh seorang Presiden. Annual Conference dibahagikan kepada lima kumpulan berdasarkan bahasa penghantar, begitu juga dengan perjalanan district dan local conference dan juga local church tadi.

Lima kumpulan itu terdiri daripada :-

- 1) Sarawak Chinese Annual Conference
- 2) Sarawak Iban Annual Conference
- 3) Chinese Annual Conference
- 4) Tamil Annual Conference
- 5) Trinity Annual Conference

Dalam mesyuarat Annual Conference ini, setiap local church akan diwakili dalam mesyuarat ini. Annual Conference ini bertemu sekali setahun untuk membincangkan sebarang perkembangan serta menyelesaikan sebarang masalah yang timbul. Seorang District Superintendent akan dilantik untuk menjaga hal ehwal perjalanan gereja-gereja Methodist didalam daerah yang telah dibahagikan oleh pihak yang berkuasa dalam Annual Conference ini.

2.5.6 General Conference

Mesyuarat ini hanya diadakan sekali dalam 4 tahun. Ia akan dipengerusikan oleh seorang Bishop. Ia akan mempunyai 14 perwakilan yang dilantik dari Annual Conference tadi. 14 perwakilan ini terdiri daripada tujuh orang paderi dan tujuh lagi "layman". Ia adalah majlis yang tertinggi dalam struktur organisasi gereja Methodist hari ini. Di sinilah segala peraturan untuk gereja Methodist digubal.